

奉化縣志卷三十三

方外

唐

開曠禪師名延達四川人少時聰穎性質孤高後出塵徧參法席唐大中二年徙崇福院於溪東殿閣改觀為岳林寺闕山第一祖

焉岳林寺志

葉靖能

成化志作葉靜

有道術嘗講經虛白觀有髯父每先來而後去若

欲言而未能者問之答曰吾乃寶藏守龍也職在觀南小海中今九百餘年矣為胡僧所禁三十春僧大咒力今年五月五日午時其術成喝水乾寶無所隱分當死惟師哀之靖能大書觀柱以識之至日赴里人飲回門人讀柱書遽使人執墨書符奔往海上見黑煙慘空毒風四起有波羅門仗劍持咒連喝海水水為之枯有

奉化縣志

卷三十三

方外

一

白龍奮鬣張口躍淺波中朱衣使投符海水復還波羅門撫劍歎曰三十年精勤一旦術盡道士多能哉明日髯父來謝願同門人指使雖秦越地阻江山路殊召之即至靖能以觀在原上艱於汲引謂之曰願濟我以泉水髯父曰師脫我千年之厄吾豈可吝一勺之報乎於是觀左水涌遂成大溪因名之曰仙師渠又曰龍溪福地任士林謂天地閒山川流峙其性也性也其道也一易其性則非道矣宜乎葉君之為神也康乾志參松鄉文集

宗亮邑之馮氏子能文善談論道行高潔日閱藏經邦人敬之亮與沙門貫霜棲悟不吟諸人迭為文會結林下交撰岳林寺碑詩集讚頌並行於世孫郃撰四明郡才名志序諸儒駿士外獨云亮多為文士先達所做仰云處士方干贈詩云秋水一泓常見底澗松千尺不生枝空門學佛知多少剝盡心花只有師兩浙名賢錄參寶慶志及

高僧傳

梁

布袋和尚名契此號長汀子形裁臞腹蹙額蹙腹寢臥無恆常以杖荷一布袋人稱爲布袋和尚凡供身之具盡貯袋中行聚落田野閒見醯醢魚菹輒入口餘以投袋中所至酒罈屠肆皆恣其飲啖不厭惡謂能使貨倍售而獲利多也嘗臥雪中雪不沾衣示人禍福輒應天將雨卽著溼草履途中遇亢暘卽曳高齒木屐市橋上豎膝而眠一日以蒿草散植民田中未幾錢氏增丁稅民亡田荒閩中陳居士者館遇甚謹答以偈曰寬卻肚皮須忍辱放開笑口暗消磨要使此心無罣礙自然證得六波羅又曰我有一布袋虛空無罣礙展開徧十方入時觀自在田家問道偈曰手捏青苗種福田低頭便見水中天六根清淨方成稻退後原來是向前梁

奉化縣志

卷三十三

方外

二

貞明二年丙子三月於岳林寺東廊石上端坐而逝岳林遂爲布袋道場後有二僧至寺云從天台見之眾謂化矣不敢信發冢視之乃空龕也得青磁淨瓶六環錫杖縣令盧釋圖像禮之先莆田令王仁祐遇於江南天興寺宛若舊識後於福州官舍又見之懷中出一圓封戒王曰我七日不至則開踰期發之乃四句偈也曰彌勒眞彌勒化身千百億時時示世人世人自不識王令至縣訪其蹟爲記其事刻偈以碑崇甯中賜號定應大師卽名閣曰崇甯邑令黃公特銘其墓焉

康乾志參兩浙名賢錄

周

蔣宗霸顯德初鄞人慈善溫謹口誦摩訶人稱蔣摩訶時布袋和尚寓岳林摩訶心異之與之處踰三年一日同浴長汀摩訶視布袋背有目布袋曰吾爲汝所窺當去矣吾以布袋賜汝俾代代爲

衣冠家布袋歸岳林坐逝葬封山後越帥遣卒過蜀遇布袋道中卒舊遊四明識之乃曰爲吾謝摩訶相見已近願自愛卒歸至岳林遇摩訶述其語摩訶曰吾已知之一日造城別親友而逝康乾志知覺名延壽錢塘王氏子周廣順二年住雪竇吳越錢氏崇信之著宗鏡錄一百卷陳忠肅公瓘贊其真曰宋之興也錢氏重民輕士歸宋用師之勸誨也康乾志

宋

明覺名重顯遂州李氏子大寂九世孫智門法嗣也宋天聖中郡太守曾會請住雪竇附馬都尉和文李遵勗請賜方袍侍中賈某奏加明覺師號呂夏卿銘其塔謚寂照康乾志

圓照名梵光字和甫邑之楊氏子其母感異夢而娠十有二月生髻齡警穎不類常見授以儒書一覽輒誦年十二出家器識卓越

奉化縣志

卷三十二

方外

三

盡通律部政和四年太守呂公綜請主延慶靖康改元高麗遣使修貢及境訪師云國王問訊謹獻法衣一并寄海東曉師所著疏論二百卷屬師流通名稱遠聞雖蠻夷亦知嚮慕焉後寓奉之福

勝

○乾道圖經勝作聖

縣有鄔氏子方疾革如有物憑附語家人曰吾汝之

先人久處幽冥聞人間有光法師者道行高潔爲眾施戒是日冥中異類悉脫沈淪故得暫歸別汝其異跡如此會延慶燬廢太守仇公念迎還舊席歸老擇陽之悟真與發運使陸寘爲方外交託以後事沐浴更衣跣趺宴坐而逝俗壽八十僧臘六十四何涇銘

其塋

乾道圖經參康乾志

覺先字澄照慈谿人初稟教於永明

○慈谿志作明智

靖康初主奉化之

寶林邑苦旱請誦金光明經甫畢大雨三日因導邑人建光明幢幡以獲福利徙主郡城延慶大宏宗教復還寶林摘經疏名言以

資觀省曰心要紹興中跌坐而逝

康乾志

宋耕字道耕號雪溪先生世家雙流遷崇慶宋紹興中爲闔中令乃以仙去後其孫德之聞其在四明親至訪焉至雪竇山有蜀僧言聞諸耆老云山後爛平山有二居士其一宋宣教也德之躋攀至爛平果見丹竈而仙蹤不可復尋矣乃置祠其上而歸樓宣獻公鑰爲賦騷詞以招之國學博士楊琛爲之記

康乾志

智融俗姓邢名澄世居京師以醫入仕南渡居臨安萬松嶺號草菴邢郎中出入禁庭賞賚殊渥年五十棄官謝妻子祝髮入靈隱寺猶以去塵俗不遠又遊諸方徑山匡廬經行殆徧聞雪竇之勝遂投迹爲終焉計假一室深坐土木形骸泊然如偶人齋餘或曳杖以出有欲相隨則謝遣之意行獨坐或至移晷人莫窺其際善畫而絕不以與人好作牛自號老牛智融山深多蛇忽作一奇鬼

奉化縣志

卷三十三

方外

四

於壁一吹火向空一躡蛇而掣其尾蛇患遂除時有火驚又於火端作土臬臬聲爲之革嘗畫龍首半體禱旱輒應作詩不多語意清絕初自言若得爲僧三十秋瞑目無言萬事休紹熙四年五月卒壽八十僧臘如師言

攻媿集

圓明陳居士裔孫嗣法東林照覺延主寺事規模丕振大暢宗風遠近名縉雲集稱爲岳林開法之祖焉上堂喝云從來學道原非易鐵石心腸始自堅不用思維尋古句還須努力向前參忽然露出虛空骨直下當知般若船一點湛湛無所繫月明退嶼水中天年八十四沐浴更衣端坐而逝

岳林寺志

和菴主

鄞志作衣和菴主

一名知和蘇州崑山人隱居雪竇山畜二虎馴

伏妙高峯千丈巖藤龕棲雲菴皆其迹也有四偈詠藤龕熙甯間左正言陳禾延和後居二靈菴宣和七年示寂塑其像二虎侍焉

元大德丁未菴爲盜燬後虎乳其墟爲人害咸謂菴復則虎息至元丙子復其菴肖其像虎不爲害

康乾志參敬止錄及乾道圖經

宏智覺名正覺隰州李氏子母趙氏生之夕光出於屋人皆異之年十五薙染十八遊方建炎三年住天童未幾金人犯明諸寺皆遣散雲遊獨覺危坐不去已而寇至登塔巔以望若有所見遂斂兵以退人皆歎以爲神助後應岳林之請遂回太白紹興丁丑十月七日沐浴更衣端坐說偈曰夢幻空華六十七年白鳥煙沒秋水連天擲筆而逝龕留七日顏貌如常葬東谷龍圖閣學士周葵

撰銘

岳林寺志參鄞志

宗珏號大休和州烏江人姓孫氏生不茹葷年十六白父母出家時長蘆祖照聲振東南珏往謁照與語奇之建炎間避地浙東居補陀巖道價愈高紹興二年開堂岳林尋退處翠山又住雪竇二

奉化縣志

卷三十二

方外

五

十九年直閣張偁招主天童珏容貌奇麗度量恢偉而見地明白深造自得死生之際尤卓然過人三十二年八月上澣整容跣跌而逝

攻媿集

法恭號石窗俗姓林母楊氏夢胡僧來謁寤而生恭父早喪年十五乃白母出家宣和七年習南山律於湖心寺繼從宏智覺禪師於天童出住明州瑞若上堂舉世尊生下指天指地公案頌曰五天一隻蓬蒿箭攬動支那百萬兵不得雲門行正令幾乎錯認定盤星歷主光孝能仁報恩彰聖瑞巖雪竇天姿勁挺持律嚴甚峭直骨髄未嘗借人以詞色皇子魏王作牧每加敬禮欲訪恭於山間辭曰路遠而險徒勞民耳其嚴冷類此丞相魏杞晚歲與恭尤厚嘗歎曰石窗空門中御史也繼流以爲名言淳熙八年逝壽八

十

攻媿集參兩浙名賢錄

智鑑號足菴全椒人俗姓吳兒時已喜佛書母嘗與洗手瘍因曰
是什麼手忽對曰我手是佛手遂視母大笑少長日記經文千餘
言連遭親喪決意出家誓修苦行以報罔極侍真歇來四明至補
陀山遇盜避地馬秦駭浪翻空坐蓬外不沾溼遯象山鄭行山變
怪百出終不能害至陳山欲航海或指曰此鄭行山中肉身菩薩
也人皆環遶求偈時天大風不可渡謂篙人曰吾爲汝借風泊登
舟俄頃抵岸逆風如故徑至岳林見宗鉅宏智動輒深契淳熙十
一年雪竇虛席念明覺智覺道場勉爲起廢一住八載所在道俗
皆仰至是尤盛隨力葺理內外一新作錦鏡以蓄飛雪上流爲一
山奇觀智鑑根器絕過人自誓不悟不爲僧則識趨已不凡操心
如鐵石視身猶土芥又人所不能及既亡太師史文惠祭之以文
曰師生於淮南而化緣獨在四明屢易法席名震江湖而終不越

奉化縣志

卷三十二

方外

六

境自號足菴人以古佛稱之惟師可以無愧云

樓鑰撰塔銘

行持明州人郡之盧氏子住餘姚法性貧甚有頌曰大樹大皮裹
小樹小皮纏庭前紫荆樹無皮也過年後住雪竇雪竇在四明與
天童育王俱號名利一日同見新守守問天童覺老山中幾僧對
曰千五百又問育王謹老對曰千僧末以問持持拱手曰百二十
守曰三刹名相亞僧乃如此不同耶持復拱手曰敝院是實數守
爲撫掌上堂云悟心容易息心難息得心源到處閒斗轉星移天
欲曉白雲依舊覆青山

雪竇寺志略參老學菴筆記

太白禪師納交孤竹君之裔飛錫於此

○案指桃花阮山二十里雲之南

擇其地

而居之留偈云昔是神仙窟今爲長者居定須攀月桂宜教子孫
書嗣趙伯圭來守此邦因太白偈訪得竺君汝舟者端憲沈公煥

誌其事藏竺氏家

寶慶志

大川名普濟蹕駐林氏子初住岳林寺嘗於二月八日彌勒道場之日大書一偈於山門曰契此老公無計性不知生日與生辰春風桃李知時節特地年年說向人題世尊出山相曰龍章鳳質出王宮肘露衣穿下雪峯智願必空諸有相不知諸有幾時空曾撰五燈會元二十卷行世

岳林寺志 參本堂集

元

曇噩號夢堂俗姓王氏世傳連山人

鄞志慈谿志 俱作慈谿人

性敏慧有捷才

讀書過目不忘博學能文時為士人推重初依長蘆寺大德中住

天台國清寺汪灝序贈夢堂作州縣去思記寺院興造塔銘碑刻

見存舊有詩詞在人傳誦

康乾志參鄞志慈谿志

祖銘字古鼎

兩浙名賢錄作石鼎

邑之應氏子幼穎悟稍長學通百氏年十

八從金峩寺僧橫山學出世法至正七年住徑山錫號慧性文敏

奉化縣志

卷三十三

方外

七

宏學普濟禪師袁桷黃潛虞集歐陽元皆稱慕之年七十九書偈

而逝有四會語錄行世

危素撰塔銘參元詩 詩選兩浙名賢錄

珣字東玉三石陳氏儒家子學佛氏之道獨喜為詩所作累千百

篇年未四十氣貌嗒然如不欲語雖習為超世忘俗之說而溫篤

孝友信乎仁義人也戴表元有珣上人刪詩序再刪詩序

剡源集

明

懷信字孚中俗姓姜氏母劉夢大星墮室中有光如火取而吞之

覺即有孕及生狀貌異凡兒性凝莊不妄動惟見沙門至必躍而

親之初授三經於剡源先生經旨悉達年十五祝髮為僧受戒於

五臺寺後居龍翔寺明太祖下金陵僧徒散去信獨結跏宴坐目

不四顧執兵者滿前無不擲杖而拜太祖嘗親幸寺中聽法改龍

翔為大天界寺一日晨興沐浴更衣跌坐謂左右曰吾得歸矣停

龕七日顏色如生前一日太祖統兵駐江陰當晝而寢夢信服褐衣來見曰將西歸告別耳上還聞遷化衣與夢中同詔內府幣帛資其喪舉龕之夕太祖親致奠送出都門之外寵榮無與同者所著有五會語錄行世

康乾志參兩浙名賢錄

大證番陽人初從昌國寺智節學出世法時雲外岫方倡曹洞之道於天童證往依之命典藏教至治間詔徵天下善書者書藏經證北上入覲事竣賜以織金之衣尋奉詔主慶元之水定閣四年

遷雪竇云

兩浙名賢錄

文沼字天鏡號粟菴慈谿孫氏子讀書明理究本宗三昧戒行精專人有過若不聞有善則樂道之洪武中興北山寺永樂中以高僧取赴京校正經典預龍華大會永樂七年仍歸北山一時文儒碩彥會集交游成社有詩一日忽告其徒辰省曰吾年六十八矣

奉化縣志

卷三十三

方外

八

今與汝訣沐浴更衣口誦法華經趺坐而逝

康乾志

茂實俗姓鄭氏世爲邑之儒家初見江南澗泉公命之住依古木茂禪師古木器其人命居首座住瑞雲山清涼寺一十五年後居天童一旦示寂憑几而逝七日容貌明潤捫其頂猶溫方舉火有物飄洒晴空如雪如雨盤旋烈焰之上火滅乃已

康乾志

子樞字用堂邑陳氏古靈先生諸孫博通儒釋奧義徧歷名山參叩尊宿其出世則鄞之大梅護聖奉化之太清與夢堂唱和吳中時以唐皎然宋道潛爲比洪武中內召至金陵宋濂爲序其詩

太清

寺志略參四明詩集

用剛輒禪師鄞陸氏子住法海寺宣宗朝會內召相傳乘赤雲而去白雲而還歷有神異故今有赤雲窩白雲窩精舍蓮池大師以其法語選列禪關策進復有獅子圖頌十二首行世

康乾志

夢遠和尚俗姓袁名應魁溧陽人有妻子兄弟田宅頗饒一日棄之出遊雁蕩靈巖依僧德誠學佛更名圓魁然不甚禮誦講解常掩室靜坐手甲長二寸餘冬夏衣一衲無增減萬厯丁亥至奉化求司成戴洵謀建靈巖寺明年寺成請記司成更其號曰夢遠作夢遠記遺之

康乾志

國朝

通雲號石奇蘇州人參天童密禪師得臨濟正宗明崇禎癸未雪竇有胡承龍之亂僧眾遊散佛殿俱燬邑人延師住持寺產之歸紳戶者悉出施之啟土構宇殿閣巍然較前增煥遠近景從爲雪竇中興之祖云

康乾志

妙行姚江人英年穎異存出世想遍參名宿後詣通元峯參密雲禪師師資相契立爲第二座住持法海六建禪林危坐而逝

康乾志

奉化縣志

卷三十三

方外

九

行正號山夫吳門嘉定陳氏子與師石奇同興雪竇寺後嗣席鑄鐘建樓及涼亭一十二楹

康乾志

昂峯名成隱連山王氏子在家誦楞嚴有會隨口成贊出世本山受具後參雪竇山和尚有真心直行之稱性沈靜寡言甘淡泊足不入城市擬寒山子作警悟時風偈數十首有戒殺文名甘露集

南山寺志

永偃字曉堂鄞嵩江朱氏子年十九依石樓景雲披薙受具示參萬法歸一歷五晝夜不交睫景雲乃轉詰曰畢竟一歸何處偃云溪清天在水雲曰未在更道偃云谷靜鳥忘山卽冬上五磊結制有同學指參楊濱靈機旋往報恩參玉林往大雄謁光明後之天童掌記室康熙丁巳回石樓省覲復往雲峯住靜未幾緇素請住太清起廢重新山川改色勒碑鐫志文獻傳聲有語錄并詩集行

世太清寺志略

奇僧字指石奇夢字德量榆林陳氏子兄弟也以世儒而習禪宗大不類俗衲口頭動拈公案者爲本空師高弟子厯主雪竇雲溪龍樹諸刹與儒者談今論古坐臥雲根竹縫託之吟詠若以詩爲棒喝也一日忽曰寰中燈焰明暗有時手中繩索收放自我遂與德量共營壽塔築定山菴以祀親著有本懷詩剡源志

仁化名雲中字睿知方橋馬氏子皈依釋氏後更名仁化厯游名山古刹晚抵京師受恩於世宗憲皇帝多詩賦文稿圓寂後其徒隱玉錄其行略并詩來族人寶而藏之其敕住萬壽寺詩金地重修壯法筵嵯峨高闕口諸天隄邊樹引丹青路門外河流白玉泉一鉢飽餐香積飯三衣深染御鑪煙皇恩浩蕩難酬報暮鼓晨鐘祝萬年乞還杭州詩三口受敕住官寺一旦乞骸歸故邱

奉化縣志

卷三十三

方外

十

深愧天恩難報答敢徇私意遂遨遊法門任重常思避齒髮年侵祇合休此去築林高百尺長依北斗望皇州清明郊行詩墟落三春路清明二月天桃妝浥細雨柳態惹輕煙空自悲風木看人拜墓田乞來香鉢飯歸薦是何年觀水詩長河春水碧於苔終日貪看不計回好記東歸滄海後弗忘積石發源來今讀其詩忠孝之氣隱然見於言表是方外之不易得者采訪

孫應乾

販裏人

家居排難解紛扶危救急有俠士風一日有異人授之術能役神鬼驅魍魅家頗豐饒有涎其貲者結匪黨數人忽於途中強索其財應乾以指書符空中默念秘咒俄頃眾皆呆立如傀儡應乾飄然竟去謂所識曰某途中有不言不動者數人以水噴之卽行試之果然自是人皆號爲法師無敢復有侮之者年七十有八傳術於子而逝采訪

興山北京籍乾隆間武狀元嘗領兵討白蓮教幾瀕於危一日受傷從此披薙爲僧住持杭州崇福寺嘉道間延主法海寺重新殿宇今寺中有遺像焉采訪

金祥鄞東鄉人生未三歲父母鬻爲解空僧薙染後喜學書兼能吟詠其歎薄命詩有此身未滿三周歲泣別雙親到解空句其次金峩詩有純陽一去蕭條甚黃葉翩翩空自飛句又有老僧靜處無閒事收拾殘雲納袖中句光緒十三年跌坐而逝忠義志

案康乾志方外有張廷賓釋名行恂攷廷賓爲周齊曾胡傳一流人物非眞爲釋者今列寓賢類